

आकाशवाणी

पैहले खास-खास खबरां:-

1. भारत ते ब्रिटेन बश्कार व्यापक आर्थिक ते बपार समझौता अज्जै थमां लागू होई गेआ ऐ।
2. केन्द्र सरकार नै पच्छिम बंगाल च ग्रामीण विकास लेई 8 जहार 5 सौ करोड़ रुपें शा मते मंजूर कीते न।
3. कोयले ते खाने सरबन्धी विभाग दे केन्द्री मंत्री जी. किशन रेड्डी अज्ज नमीं दिल्ली च महत्वै आहले ते सामरिक खनिज खंडे दी नीलामी दे 8में गेड़ गी शुरु करगन।
4. होर्मुज जल डमरु मध्य थमां लंगने आले कारोबारी जहाजें पर तेहरान दे हालिया हमले दे परते च अमरीका नै ईरानी बंदरगाहें दी नाकेबंदी परतियै शुरु करी दिती ऐ।
5. स्पेन ने कल रातीं अमरीका दे टेक्सास च खेड्ढे गेदे फीफा विश्व कप दे पैहले सेमीफाईनल च फ्रांस गी 2-कन्नै 0 हराइयै फाईनल च थाहर पक्की करी लैती ऐ।
6. क्रिकेट च कल भारत नै इंग्लैंड गी मजूदा श्रृंखला दे पैहले इक ध्याड़े आले मैच च 6एं विकेटें कन्नै हराई दिता ऐ।

<><><><><><>

India-UK CETA

भारत ते ब्रिटेन बश्कार व्यापक आर्थिक ते बपार समझौता अज्जै थमां लागू होई जाग। इस ऐतिहासिक समझौते तैहत भारत थमां निर्यात 99 फीसदी चीजें पर ब्रिटेन दे बाजार च कोई शुल्क नैई लग्गोग। एह समझौता भारत ते ब्रिटेन दी रणनीतिक

सांझेदारी गी मज़बूत करने ते अपने लोकें लेई खुशहाली आनने दी सांझी वचनबद्धता गी दर्शादा ऐ। एह समझौता लोकें दे हितें गी ध्यानै च रक्खियै तैयार कीता गेदा ऐ- जेदे च समाज दे हर वर्ग गी फायदा पुज्जोग। नमीं दिल्ली च मीडिया आहलें कन्ने गल्ल करदे होई वाणिज्य सचिव- राजेश अग्रवाल होरें भारत-ब्रिटेन व्यापक आर्थिक ते वाणिज्य समझौते गी भारत दे वाणिज्य सफर च इक मील दा पत्थर दस्सेआ। उ'नें आखेआ जे एह दंडू बड़्डियें अर्थबवस्थाएं च भविक्ख गी ध्यानै च रक्खियै तैयार कीती गेदी आर्थिक भ्याली ऐ। कल नमीं दिल्ली च मीडिया गी सम्बोधित करदे होई उ'नें दस्सेआ जे एह समझौता भारत-ब्रिटेन च होने आले दपक्खी वाणिज्य ते पूंजीनिवेश च इक नमें मरहले दी शुरुआत ऐ।

<><><><><><>

WB Dev.

राई-बाई ते ग्रामीण विकास मंत्री शिवराज सिंह चौहान होरें कल कोलकाता च पच्छिम बंगाल दे मुखमंत्री सुवेदु अधिकारी, राज्य कैबिनेट दे सदस्यें ते केन्द्र ते राज्य सरकार दे वरिष्ठ अधिकारियें कन्ने इक उच्च स्तरी समीक्षा बैठक दी प्रधानता कीती। श्री चौहान होरें ऐलान कीता जे केन्द्र नै पच्छिम बंगाल च ग्रामीण विकास लेई 8 जहार 500 करोड़ रुपें शा मते दी रकम गी मंजूरी दिती ऐ। राज्य दे जोगदान गी मलाइयें अगले बरे मार्च तोड़ी पंचैतें दे माध्यम कन्ने 12 जहार करोड़ रुपें शा मते खर्च कीते जाडन। उ'नें आखेआ जे सरकार दा लक्ष्य ग्रामीण रोजगार गी 100 शा बधाइयै 125 दिन करना ऐ ते विकसित भारत जी-राम-जी कनून 2025 दे तैहत नमां ग्रामीण

रोज़गार ढांचा लागू करना ऐ जेदे च टिकाऊ ग्रामीण सम्पत्तियां बनाने पर बल दिता जाहग।

<><><><><><>

Mines Auction

कोयले ते खानें सरबंधी विभाग दे केन्द्री मंत्री जी. किशन रेड्डी अज्ज नमीं दिल्ली च महत्वै आहले ते सामरिक खनिज खण्डे दी नीलामी दे 8में गेड़ गी शुरु करगंन।

खान मंत्रालय नै दस्सआ जे एहदे तैहत 9वें राज्यें च फैले दे 20 सामरिक महत्वै आहले खनिज खण्ड शामिल होइन- जिंदे चा 13 नमें शिनाख्त कीते गेदे खण्ड न ते 7एं खण्डें दी दुई बारी नीलामी कीती जा'रदी ऐ। इनें खनिज खण्डें च Molybdenum, Graphite, Glaucinite दुर्लभ तत्व- Titanium, Tungsten, Potash, Lithium, Cesium ते Rubidium शामिल न।

स्वच्छ ऊर्जा लेई एह खनिज अत महत्वै आहले न। एहदे इलावा अज्जै-कल्लै आहले उत्पादन रसैनी हैल- रक्षा ते दुए सामरिक सैक्टरें च बी इंदी मती भूमिका रौहग। नीलामी दे 7 गेड़ मुकम्मल होई चुके दे न। मंत्रालय नै 88एं सामरिक महत्वै आहले खनिज खण्डें चा 56एं दी नीलामी 63 प्रतिशत सफलता कन्नै करी लैती दी ऐ।

<><><><><><>

Jaishankar

बदेश मंत्री डाक्टर एस.जयशंकर होरें अज्ज ब्रसेल्स च यूरोपी संघ दे बदेशी मामलें ते सुरक्षा नीति दी उच्च प्रतिनिधि काज़ा कल्लास हुंदे'नै मलाटी कीती। सोशल मीडिया दी

इक पोस्ट च डाक्टर जयशंकर होरें आखेआ जे पच्छिम बंगाल च शांति ते स्थिरता जकीनी बनाने दी जरूरतें पर उन्दी सार्थक चर्चा होई। दौनें नेताएं सुरक्षित ते निर्विघ्न समुन्दरी बपार दे महत्वें पर बी बचार-बटांदरा कीता। मंत्री होरें इब्बी दस्सेआ जे उ'नें आपूर्ति श्रृंखला दी मज़बूती जकीनी बनाने लेई भारत-यूरोपी संघ रणनीतिक सांझ-भ्याली गी अगगे बधाने पर चर्चा कीती। इक होर पोस्ट च काज़ा कल्लास होरें आखेआ ऐ जे भारत ते यूरोपी संघ दे सरबंधें लेई एह ऐतिहासिक बरा ऐ जेहदे च बपार-तकनीकें- सुरक्षा ते रक्षा दे खेतरें च दौनें पक्खें बश्कार सहयोग मज़बूत होआ करदा ऐ।

<><><><><><>

US-Iran

होर्मुज जल डमरु मध्य थमां लंगने आले कारोबारी जहाजें पर तेहरान दे हालिया हमलें दे परते च अमरीका नै ईरानी बंदरगाहें दी नाकेबंदी परतियै शुरु करी दिती ऐ। इक टी.वी न्यूज चैनल गी दिते गेदे इंटरव्यू च अमरीका दे राष्ट्रपति डोनाल्ड ट्रम्प होरें आखेआ कि जेकर लोक होर्मुज थमां लंघना चाहंदे न तां एह रस्ता खुल्ले दा ऐ पर ईरान आस्तै एह बंद ऐ। ट्रम्प होरें तेहरान गी चेतावनी दिती जे अमरीका अज्ज रातीं थमां ईरान पर हमला करने आला ऐ ते इनें हमलें दी तीव्रता हर अगली रात दे कन्ने बधदी जाहग। उ'नें आखेआ जे जिसलै धोड़ी ईरान गल्लबात पर नैई औंदा तंदु धड़ी अमरीका ओदे सब्भनें बिजली संयंत्रें ते पुलें गी निशाना बनागा। ट्रम्प होरें आरोप लाया जे ईरान जो किश बी आक्खदा ऐ ओह झूठ ऐ कीजे ओह म्हेशां थमां परमाणु थेहार हासल करना चाहंदा ऐ। उ'नें ईरानी सरकार दे नेताएं गी आखेआ जे हुन उन्दे कश

इक्कै विकल्प बचे दा ऐ जां ते ओह समझौता करी लैन ते जां फही उंदा कोई नामो-निशान नैई बचोग। तौंआई ईरान ने इस्लामिक रिवोल्यूशनरी गार्ड कोर –IRGC ने बड़्डे पैमाने पर हमले करदे होई बहरीन च थेहारें ते भंडारण केन्द्रें गी निशाना बनाया ऐ।

<><><><><><>

Shri Amarnath Yatra

श्री अमरनाथ जी दी यात्रा पर औने आहलें श्रद्धालुएं दा जोश बरोबर बने दा ऐ। यात्रा शुरू होने दे 12एं दिनें च गै पवित्र गुफा च मत्था टेकने आले श्रद्धालुएं दा आंकड़ा 3 लकख गी पार करी गेआ ऐ। उपराज्यपाल मनोज सिन्हा होरें सोशल मीडिया राएं इस बारे इक पोस्ट कीता। एल.जी होरें सारें अफसरें, सेवा उपलब्ध करोआने आहलें, स्वसेवियें ते होरनें सरबंधत धड़ें दी सिफ्त कीती ऐ जेड़े पूरी निश्ठा कन्ने इस पवित्र यात्रा गी बवस्थित ते रमानदारी आहले ढंगे सिर करोआने लेई जत्न करा रदे न। एह यात्रा 3 जुलाई गी शुरू होई ही ते 10 जुलाई तगर 2 लकख थमां बद्ध श्रद्धालुएं पवित्र गुफा च मत्था टेकी लेदा हा।

तौंआई एह सालाना यात्रा इस बरे 28 अगस्त गी रक्खड़ पुन्नेया आले दिन सम्पन्न होई जाग। इस श्री अमरनाथ जी श्रद्धालुएं दा 14मां जत्था अज्ज बड़्डलै सख्त सुरक्षा बंदोबस्ते हेठ जम्मू दे भगवती नगर “यात्री निवास” आधार शिविर थमां कश्मीर घाटी लेई रवाना होआ। अज्ज रवाना होए दे इस जत्थे 6 जहार 251 श्रद्धालू हे, जेड़े 230 गड़्डियें दे काफिले च सोआर होइयै घाटी लेई रवाना होए। इंदे चा 2 जहार 985 श्रद्धालु बालटल लेई ते 3 जहार 266 श्रद्धालू पैहलगाम लेई रवाना होए दे न। इस

जत्थे च कुल 4 जहार 439 मर्द, 1 जहार 614 महिलां, 13 बच्चे, 78 साधु, 93 साध्वियां ते 3 ट्रांसजेंडर श्रद्धालु, इक लौहकी उम्मी दा साधु ते 50 विदेशी श्रद्धालु शामिल हे।

<><><><><><>

FIFA

स्पेन ने कल रातीं अमरीका दे टेक्सास च खेड्ढे गेदे फीफा विश्व कप दे पैहले सेमीफाईनल च फ्रांस गी 2-0 कन्नै हराइयै फाईनल च थाहर पक्की करी लैती ऐ। स्पेन लेई मिकेल ओयार ज़ाबल ने 22में मिंटे च पेनल्टी पर पैहला गोल कीता। एदे परैन्त 58में मिन्ट च पैड्रो पोरो ने दुआ गोल दागेआ। तोंआई अज्ज रातीं अर्जेन्टीना ते इंग्लैंड बशकार फीफा विश्व कप दा दुआ सेमीफाईनल होग ते एदे जेत्तू दा मुकाबला फाईनल च स्पेन दे कन्नै होग।

<><><><><><>

Cricket

क्रिकेट च कल भारत नै इंग्लैंड गी मजूदा श्रृंखला दे पैहले इक ध्याड़े आले मैच च 6एं विकेटें कन्नै हराई दिता ऐ। बर्मिंघम दे एजबेस्टन च खेड्ढे गेदे मुकाबले च इंग्लैंड नै पैहले बल्लेबाजी करदे होई 258 रन्ज बनाए। परते च भारत नै 45 ओवरें त 2 गेंदें च 4 विकेटां मुहाइयै 262 रन्ज बनाए ते लक्ष्य हासल करी लैता। कप्तान शुभमन गिल ने सब्भनें शा मते 80 रन्ज बनाए जिसले के अक्षर पटेल ने नाबाद 57 रन्ज ते वाशिंगटन सुंदर ने नाबाद 52 रन्जें दी पारी खेड्ढी। एहदे शा पैहले इंग्लैंड लेई जो रूट ने 76 ते लियाम डॉसन ने 68 रन्ज बनाए। भारत दी तरफा अक्षर पटेल ने 4 विकेटां

लैतियां ते उने'गी प्लेयर ऑफ दे मैच चुनेआ गेआ। 3 मैचें दी श्रृंखला दा दुआ मुकाबला कल 16 जुलाई गी कार्डिफ च खेडढेया जाहग।

<><><><><><>

Weather

मौसम विभाग नै अज्ज ओडिशा च तेज बरखा बरने दी रेड अलर्ट आली चेतावनी जारी कीती ऐ। विभाग नै अज्ज बिहार च ते कल्लै धोड़ी पूर्वी भारत- छत्तीसगढ़- झारखंड ते पच्छिम बंगाल च मौलेधार बरखा दा अंदाजा जताया ऐ। अंडमान ते निकोबार टापुएं/ पच्छिम बंगाल/ जम्मू-कश्मीर/ लद्दाख/ आंध्र-प्रदेश/ कर्नाटक/ केरल/ माहे ते तेलंगाना च अंधी-झक्खड़ दे कन्नै शमानी बिजली पौने दे असार बी हैन। अगले दंऊ दिनें तगर कोंकण/ गोवा/ मध्य महाराष्ट्र/ मराठवाड़ा ते उत्तराखंड च बी नेह गै हालात बने दे रौहडन। विभाग मुजब कल्लै धोड़ी दिल्ली/ हरियाणा/ चंडीगढ़/ कर्नाटक/ पंजाब/ रायलसीमा ते उत्तर प्रदेश च मौसम गर्म रौहने दे असार न।

<><><><><><>